

Negin «friendship-ticket» dalla Dertgira nauscha

■ (anr/hh) Il gliendisdis sera ha la Dertgira nauscha dau sias sentenzias a Mustér. Ord ina retscha da plirs candidats han ils treis derschaders tscharniu ils Stadis Uni dall'America e surdau il delinquent agl um ner. Dapi entgins onns ei la Dertgira nauscha ina part integrala dil tscheiver a Mustér. A moda critica e per part cinica pren ella sut la marella schabetgs digl onn passau da Mustér e dil contuorn. Ella ei in element zun attractiv ch'attira onn per onn bia gliedud sin la piazza communal. La sentupada vegn embellida da produziuns dallas musicas da tscheiver. Per la secunda ga ein las sentenzias dalla Dertgira nauscha stadas sut la direcziun dils treis giuvens indigens *Fabian Huonder*, *Marco Schmed* ed *Yvonne Gienal*. Danovamein han els capiu d'enzugliar dabia verdad e seriusadad en in'emperneivla atmosfera da tscheiver.

Viver e schar murir

La Dertgira nauscha ha tschentau la sera sut il motto: «Viver e schar murir». Sogn Pieder para ella da haver levantau da mort en veta: «Lein entscheiver leu nua che nus havein calau si tschei onn: Igl onn vargau havein nus liberau s. Pieder giud la fuortga. Dapi lu ha ei mo pli fatg

bi e bellezza, ina stad sco aunc mai; era neiv ha ei dau avunda.» Pauc bien lai ella vid la posta: Sch'ins dat ora en in liug, ston ins spargnar en tschel ed aschia eis ei buca da far curvien ch'ins sto serrar las portas. Ils gronds van cun la paga ed ils pigns survegnan fridas. Il medem constatescha ella era sin claustra. Fertion ch'ins hagi giu bia daners per novas cellas solaras, hagien ins sbassau massivamein la paga d'in collaboratur. Tenor il motto: «Si cul solar, giu cul salari!»

«Lenkixmanever» dils da Sumvitg

Naturalmein ch'il «MusicStar» ei era staus in tema dalla Dertgira nauscha. Ella constatescha che differents fans dil Mario han era stuiu dar intervestas ella halla da musica a Turitg. Cura che quels savevien buca vinavon cul tudestg, grevien els semplamein: «Tgi che sa romontsch, sa dapli». Per ils derschaders ei igl um ner nuot auter che l'intenziun dils da Sumvitg da vuler zuppentar autras caussas: Bostgers che sescognan, abdicaziuns dretg e seniester, augsegners che bettan ord baselgia il giug da Nadal inclusiv ils scolars. Critica ha era l'organisaziun dalla Fiasta districtuala da cant a Mustér retschiert. La fiasta seigi stada in success, da quei hagien ins udiu da

Vella entochen Tschamut. Da quei success hagian ils gidonters denton sentiu pauc. Empermess havevien ils organisateurs 20 francs per persuna e per ura. Dau hagi ei ina tscheina da vienerlis. Tenor il motto: «Carmalau las nuorsas cun sal e sunter dau cul pal.»

Raclette sper la toilette

Ina dallas novas purschidas dallas Pencilas Mustér – sper autras novaziuns – ei la specialitad «raclette sper la toilette». Tenor la Dertgira nauscha san ins guder quella specialitad a Lai Alv. Ils derschaders han priu sut la marella il cass dil president partent da Sedrun Mustér Turissem. Sche quel havessi stuiu dir ils motivs da sia demissiun en in lungatg modern, lu havessi el stuiu conceder ch'ins hagi fatg mobbing cun el. Apropos mobbing: Ins hagi era saviu leger en La Quotidiana ch'ei detti in mobbing giustificau. Quella noziun ha la dertgira eliegiu sco «plaid malgartegiau digl onn 2003».

Ina ovra zun gartegiada para il niev parcadi per impedi sut la Casa Cuminad esser. Quel che hagi giu l'idea da scaffir quel, fuvì il pli davontier cura ch'ins hagi partiu ora l'intelligenza. Il parcadi sesanfla numnadamein en in liug cun pendenza, ina situaziun nun-

pusseivla per in impedi cun sutga da rodas. La fin finala ei era aunc la nova piazza da termagliar el Center da sport e cultura vegnida tematisada: Quella carmala las mummas da saver vegnir e far il clatsch dil di ed ils pigns da far il buatsch dil di.

Il punct culminont

La Dertgira nauscha ha criticau ils Stadis Uni dall'America pervia da lur sensaziuns en connex cun la setschentada sil mars. Sco a sias uras sin la glina, seigien ils maletgs era quella ga super-recents. Per survegnir da quellas fotografias stoppien ins denton buca serender sil mars. Talas sappien ins far la stad el contuorn dil tierz runal el territori da skis. Medemamein hagian ils Americans il sentiment ch'els stoppien far star mintgin che mondi buc a gentar el McDonalds. La dertgira tschenta la damonda: «Essan nus buca habels da mirar sez per nossa segirtad e fa ei basegns che l'America mira ch'ei seigi uorden sin quest mund? Aber sch'ei elegian da quels sco il Schwarzenegger che san buca pli differenziar denter film e realitad, eis ei buca da smarvegliar.» Il delinquent – ils Stadis Uni dall'America – ei vegnius surdaus sunter la sentenza agl um ner.